

**Uunga siunnersuut:****Pigisanik aalaakkaasunik piginnaatitaaffimmik pisisarneq imaluunniit  
atuisinnaatitaaneq pillugu Inatsisartut inatsisaat**

*Pigisanik aalaakkaasunik piginnaatitaaffimmik pisisarneq imaluunniit atuisinnaatitaaneq*

**§ 1.** Inuit aamma inatsisitigut pisinnaatitaallutillu pisussaataasut, Inatsisartut inatsisaanni matumani aalajangersakkat malillugit tamanna pisussaasimanngippat, Kalaallit Nunaanni pigisamik aalaakkaasumik piginnaatitaaffimmik pisisinnaanngillat aammalu Kalaallit Nunaanni nunaminertanut atuisinnaatitaasinnaanatik.

*Imm. 2.* Inatsimmi matumani aalajangersakkat taamaaqataanik pilersaarusiorneq aamma nunaminertat atorneqartarnerat pillugit Inatsisartut inatsisaannik nalunaarut nr. 4, 25. januaari 2024-meersoq naapertorlugu nunaminertamik atuisinnaatitaanissamik qinnuteqaatinut atuutsinneqarput.

**§ 2.** Inatsisartut inatsisaat manna utaqqiisaasumik atuisinnaatitaalernissamut, tassungalu ilanngullugu assersuutigalugu bed and breakfast-itut attartortitsinermut, airbnb aqutigalugu sivikitsumik attartortitsinermut, tikeraanut angerlarsimaffimmu, tikeraanut ininut, motel-inut, cabin-inut, akunnittarfinnut assigisaannulluunniit, atuutinngilaq.

*Imm. 2.* Inatsisartut inatsisaat Namminersorlutik Oqartussat, naalagaaffiup imaluunniit Kalaallit Nunaanni kommunit Kalaallit Nunaanni pigisanik aalaakkaasunik piginnaatitaaffinnik pisisarneri imaluunniit atuisinnaatitaaneri, imaluunniit Kalaallit Nunaanni nunaminertanik atuisinnaatitaalertarneri ilaatinneqanngillat.

*Imm. 3.* Inatsisartut inatsisaanni sumiiffinni teknikkimullu atortulersuutini, Kalaallit Nunaanni Illersornissamut isumaqatigiisummi siunertanut atorneqartuni pigisanik aalaakkaasunik piginnaatitaaffinnik pissarsisarnerit imaluunniit atuisinnaatitaalernerit imaluunniit sumiiffinnut atuisinnaatitaalertarnerit ilaatinneqanngillat.

*Imm. 4.* Oqaasertaliussamut Pituffimmi Illersornissaqarfik ilaatinneqanngilaq.

**§ 3.** Inuit danskisut innuttaassuseqartut Kalaallit Nunaanni pigisanut aalaakkaasunut piginnaatitaanermik imaluunniit atuisinnaatitaanermik pisisinnaapput.

**§ 4.** Inuit danskisut innuttaassuseqanngitsut Kalaallit Nunaanni pigisanut aalaakkaasunut piginnaatitaanermik imaluunniit atuisinnaatitaanermik pisisinnaapput inuk pineqartoq:

- 1) Kalaallit Nunaanni aalajangersimasumik najugaqarpat, aammalu ukiut marluk siuliini sivilunerusumiluunniit inuit allattorsimaffianni nalunaarsorsimappat, aamma
- 2) Kalaallit Nunaannut tamakkiisumik akileraartussaataappat, aammalu ukiut marluk siuliini sivilunerusumiluunniit Kalaallit Nunaannut tamakkiisumik akileraartussaasimappat.

§ 5. Suliffeqarfiit aningaasalersuisartut, kreditinstitut-it aamma sillimmasiisarnermullu ingerlatseqatigiiffiit, ilanngullugit inuunermut sillimmasiisarnermut ingerlatseqatigiiffiit kiisalu soraarnerussutisiassanut aningaasaateqarfiit allallu Danmarkimi, Kalaallit Nunaanni imaluunniit Savalimmiuni najugaqartut, aammalu Finanstilsynet-imit imaluunniit Tryggingareftirlitið-imit nakkutigineqartussaasut, Kalaallit Nunaanni pigisanut nalilinnut piginnaatitaaffimmik pisisinnaatitaapput imaluunniit atuisinnaatitaalersinnaapput.

§ 6. Ingerlatseqatigiiffiit aningaasaliisartut, Kalaallit Nunaanni najugaqartut Kalaallit Nunaanni pigisanut aalaakkaasunut piginnaatitaaffimmik pisisinnaapput imaluunniit atuisinnaatitaalersinnaapput, ingerlatseqatigiiffiup aningaasaliisartup aningaasaataanik tamarmiusunik pigisaqarunik, aammalu taasisinnaatitaanerit tamarmik inunnit §§ 3-4-mi taaneqartunit toqqaannartumik taasisinnaatitaaffigineqarpata.

§ 7. Inuit imaluunniit suliffeqarfiit, akuerineqarnerit, akuersissutit uppersaatilluunniit atuuttut, aalisarnermut Inatsisartut inatsisaat, aatsitassanut tunngasunik suliaqarneq pillugu Inatsisartut inatsisaat, najukkani aatsitassanut tunngasunik suliaqarneq pillugu Inatsisartut inatsisaat, aatsitassat pillugit ingerlatallu tamatumunnga pingaarutillit pillugit inatsisartut inatsisaat (aatsitassanut ikummatissanullu inatsit), takornariartitsinermut aamma inuussutissarsiutigalugu suliaqarnermi nunap aggornerinut il.il. Inatsisartut inatsisaat, imaluunniit sumiiffinni toqqaarneqartuni takornariartitsisarnissamut akuersissutitut Inatsisartut inatsisaat imaluunniit Sermip erngullu niuernikkut iluaqutigineqarnissaat pillugu Inatsisartut inatsisaat naapertorlugit Naalakkersuisunit tunniunneqartut tunngavigalugit suliaminnik ingerlatsisut, Kalaallit Nunaanni pigisanik aalaakkaasunik, suliffeqarfimminni atugassaminnik piginnaatitaaffimmik pisisinnaapput imaluunniit atuisinnaatitaalersinnaapput.

§ 8. Kalaallit Nunaanni pigisanik aalaakkaasunik piginnaatitaaffimmik pisisinnaaneq imaluunniit atuisinnaatitaalersinnaaneq aamma suliffeqarfiit, Kalaallit Nunaanni pigisanik aalaakkaasunik toqqaannartumik toqqaannangitsumilluunniit piginnaatitaasunut atuisinnaatitaasunulluunniit imaluunniit taasisinnaatitaasunut atuutsinneqartutut isigineqassaaq.

§ 9. Inuit suliffeqarfiillu, §§ 3-7-imi piumasaqaatinik naammassinninngitsut taamaallaat Naalakkersuisut siumoortumik allakkatigut akuersissuteqarnerini Kalaallit Nunaanni pigisanik aalaakkaasunik piginnaatitaaffinnik pisisinnaapput atuisinnaatitaalersinnaallutilluunniit. Taamatuttaaq imm. 1 Kalaallit Nunaanni pigisamik aalaakkaasumik, Kalaallit Nunaanni Eqqartuussisaaseq pillugu Inatsimmi kapitali 49 naapertorlugu qularnaveeqqutitut atorneqarsinnaasussatut tigusinermut atorneqarsinnaavoq.

*Imm. 2.* Naalakkersuisut qinnuteqaatip nalilersorneqarnissanut atugassanik allakkianik paasissutissanillu annertunerusunik saqqummiussinissamik qinnuteqartoq pisussaaffilersinnaavaat.

*Imm. 3.* Kalaallit Nunaanni pigisamik aalaakkaasumik pisinissamut akuersissummik qinnuteqaatip nalilersorneqarnerani qinnuteqaatit ataasiakkaat ataasiakkaatigut nalilersorneqassapput.

*Imm. 4.* Naalakkersuisut akuersissutaat sukumiisunik atugassaqaartitsiffiulluni piumasaqaateqartinneqarlunilu, aammalu piffissamut killilerneqarluni nalunaarutigineqarsinnaavoq

*Imm. 5.* Naalakkersuisut pigisamut aalaakkaasumut atuisinnaatitaagallartarneq pillugu maleruagassanik, ilanngullugulu atuisinnaatitaagallarnermut piffissap sivilisnerpaaffissaa pillugu maleruagassanik, aalajangersaasinnaapput.

**§ 10.** Kalaallit Nunaanni pigisamik aalaakkaasumik piginnaatitaaffimmik imaluunniit atuisinnaatitaaffimmik kingornussinikkut, kingornussassanik suliaqarfiunngitsumik tigusinikkut imaluunniit ataatsimut pigisanik agguaanikkut tigusisoqassappat, § 9 malillugu Naalakkersuisut akuersissuteqarnissaat pisariaqanngilaq. Tamannattaq Kalaallit Nunaanni pigisamik aalaakkaasumik ilaqutariinni siulinut kinguaanullu tunissutigineqartumik piginnaatitaaffimmik pissarsinermut imaluunniit atuisinnaatitaaffimmut atuuppoq.

#### *Atortussaatisinnginneq il.il.*

**§ 11.** Kalaallit Nunaanni pigisamik aalaakkaasumik, inatsimmi matumani aalajangersakkat uniorlugit piginnaatitaaffimmik pissarsineq imaluunniit atuisinnaatitaaneq atuutsinneqartussaannngilaq.

**§ 12.** Kalaallit Nunaanni pigisamik aalaakkaasumik piginnaatitaanermik pissarsiamik imaluunniit atuisinnaatitaanermik Kalaallit Nunaanni Eqqartuussivimmut nalunaarsugassamik nalunaaruteqarnermi, imaluunniit nunaminertamik atuisinnaatitaanermik qinnuteqarnermi, pisisup qinnuteqartulluunniit §§ 3-7-imi imaluunniit § 10-mi piumasaqaatit naammassisimanngippagit Naalakkersuisuniit akuersissut takutinneqassaaq.

*Imm. 2.* Kalaallit Nunaanni Eqqartuussiviup Kalaallit Nunaanni pigisamik aalaakkaasumik piginnaatitaaffimmik pissarsiaq imaluunniit atuisinnaatitaaneq, oqaasertaliussami matumani aalajangersakkanut uniuuttoq nalunaarsugassanngorlugu nalunaarutigineqarpat piumasaqaat itigartissavaa.

*Imm. 3.* Nunaminertanik atugassiisarnermut oqartussaasut Kalaallit Nunaanni pigisamut aalaakkaasumut pissarsiamut, inatsimmi matumani aalajangersakkanut uniuuttumut nunaminertamik atugassinneqarnissamik qinnuteqartoqarnerani itigartitsitsissapput, tak. § 1, imm. 2.

#### *Avaqqussineq*

**§ 13.** Inatsisitigut isumaqatigiissutit, oqaasertaliussami matumani maleruagassanik saneqqutsiniarnermik siunertaqarluni isumaqatigiissutigineqartut ilimagineqartariaqartut atuutissanngillat.

### *Pineqaatissiinerit*

§ 14. § 9, imm. 1, takuuk § 1, imm. 1-2 kiisalu atugassarititaasut § 9, imm. 4 naapertorlugu aalajangersarneqartut unioqqutinneqarnerat Kalaallit Nunaannut Pinerluttulerinermut inatsimmi maleruagassat malillugit akiliisitsinertut ilusilinnik pineqaatissiinermik malitseqarsinnaavoq.

*Imm. 2.* Najoqqutassanut § 9, imm. 5 naapertorlugu aalajangersarneqartunut Kalaallit Nunaannut Pinerluttulerinermut inatsimmi maleruagassat malillugit pineqaatissiinernik akiliisitsinertut ilusilinnik aalajangersaasoqarsinnaavoq.

*Imm. 3.* Inatsisartut inatsisaat imaluunniit najoqqutassat Inatsisartut inatsisaat naapertorlugu aalajangersarneqartut akiliisitsinermik aalajangersaanissamik tunngavissiisimappata, akiliisitsineq Kalaallit Nunaannut Pinerluttulerinermut inatsimmi kapitali 5-imi maleruagassat malillugit inatsisitigut pisinnaatitaasumut pisussaatitaasumullu akiligassanngortinneqarsinnaavoq.

*Imm. 4.* Akiliisitsinerit Nunap karsianut tutsinneqassapput.

### *Atuutsitsilerneq*

§ 15. Inatsisartut inatsisaat ulloq XX. XXX 2025 atuutilerpoq.

*Imm. 2.* Inatsisartut inatsisaat pigisanik aalaakkaasunik piginnaatitaaffinnik piginnilernissaq pillugu isumaqatigiissutitut imaluunniit atuisinnaatitaalernissaq pillugu isumaqatigiissutitut Inatsisartut inatsisaata atuutilereernerata kingorna isumaqatigiissutigineqartunut, atuuppoq.

*Imm. 3.* Peqatigisaanik 2025-mut llassutitut aningaasaliissutitut inatsimmi suliassa qarfimmut 70-72 Ineqarnermut Attaveqaasersuutinullu Naalakkersuiso qarfik, oqaasertaliussaq nr. 4, atorunnaarsinneqarpoq.

*Namminersorlutik Oqartussat, ulloq xx. xxx 2025*

**Jens-Frederik Nielsen**  
Naalakkersuisut Siulittaasuat